

2021



ISLA(•)ONLINE

Diahuebs 22 Juli 2021

Email: IslaOnline@gobierno.aw Tel: 528-4900

2021



AÑA DI RECUPERACION

ISLA ONLINE
NOTICIA DI GOBIERNO



GOBIERNO DI ARUBA



PROME MINISTER DI ARUBA

EVELYN WEVER-CROES

Prome Minister Evelyn Wever-Croes: Riba di 4 dia di reunion cu sindicatonan riba e tema di empleado publico

AMBTEENAARNAN NO MESTER ENTREGA MAS DI 12.6%

**“Aworakinan nos ta hasta mirando riba ki termino e
ambtenaar por entrega menos”**

Den su decalaracionnan riba e di 4 dia di reunion cu stakeholders, Prome Minister Evelyn Wever-Croes a elabora riba e reunionnan cu sindicatonan. Gobierno a duna un presentacion di loka ta inclui den e landspakket y loka ta trata e posicion di ambtenaar. A duna un splicacion amplio di full e timeline y kico tur a wordo palabra. E sindicatonan tabata tin algun pregunta cu a logra contesta di biaha.

“Aworaki tin estudionan ta wordo haci pa mira kico ta e miho cambionan cu a wordo proponi pa tin mas eficiencia den e aprato gubernamental. Kiermeen nos no ta na un punto ainda na unda decisionnan a wordo of ta wordo tuma. Nos ta den e fase di studia y ora esaki ta cla y e resultadonan ta conoci e ora nos lo sinta bek cu sindicatonan pa asina tur empleado ta representa den esaki”, Prome Minister a duna di conoce.

Sindicatonan a puntra si ta berdad ambtenaarnan mester bay entrega mas di 12.6%. E contesta ta NO, Prome Minister a enfatisa. “Aworakinan nos ta hasta mirando riba ki termino e ambtenaar por entrega menos. Pues poco poco duna e ambtenaar mas placa bek”.

Riba e tema si ta berdad a keda dicidi cu e edad di pensioen a bira 66 año, Prome Minister a indica cu esaki tampoco ta e caso. Pa Aruba e edad di pensioen ta yega 65 año na año 2024. Esaki at un decision y ley cu e gabinete anterior bou sr. Mike Eman a pasa na 2014 cu den 10 año lo hisa e edad di pensioen. Esey ta e unico cos cu tin awor. Den cuadro di landspakket a keda acorda cu lo bay haci un investigacion otro año con fuerte e fondo di pensioen ta. Ora esaki ta cla e ora lo



bay papia kico mester haci pa e fondo ta fuerte. Por haci hopi cos berdad pa haci e fondo mas fuerte y un di nan lo ta pa hisa e edad di pensioen.

Un otro pregunta cu sindicatonan tawata tin ta si ta berdad cu ya tur cos a wordo dicidi caba y empleadonan no tabata tin nada di bisa. Prome Minister riba e pregunta aki a enfatisa cu nada a wordo dicidi pa loka ta trata empleadonan publico. Aworaki apenas tin e inventarizacionnan, e estudionan ta tumando luga.

“Nos a palabra cu sindicatonan cu asina un di e estudionan ta cla, nan ta e promenan pa hañe pa asina nos por sinta na mesa y dialoga over esaki tambe pa nos yega na e miho resultado posibel”, Prome Minister Evelyn Wever-Croes a duna di conoce.

Prome Minister Evelyn Wever-Croes: Apertura di olimpiada ta inicia diabierna

GOBIERNO TA DESEA EXITO NA E DELEGACION CU LO REPRESENTA ARUBA NA TOKYO



E weganan di Tokyo 2020 ta inicia 23 di juli 2021 y Aruba su delegacion ta na Tokyo cla pa representa nos den olimpiada. E olimpiada yama "Tokyo 2020" pa motibo cu e mester a tuma luga aña pasa, pero a wordo posponi pa e aña aki pa motibo di e Pandemia. Prome Minister Evelyn Wever - Croes ta haci apelacion na henter comunidad pa sintonisa e acto inaugural cu lo inicia diabierna 23 di juli desde 7or di mainta pa mira Aruba su delegacion den e desfile y participando den e weganan den e dianan venidero.

Aruba ta e di 10 pais den e desfile, pues ta calcula cu despues di 7:30 di mainta Aruba lo ta na turno. Lo ta sumamente emocionante y bunita pa mira Aruba su atletanan y nos bandera durante di e ceremonia di apertura.

UNIFORM DISEÑO DI SRA. MAGALY MADURO

Premier Wever - Croes a expresa cu a tuma nota di e bon preparacion di Aruba su atletanan cla pa representa Aruba y nan uniform tambe cu ta hopi bunita, diseña pa sra. Magaly Maduro. "E diseño di e uniform ta encera elementonan di deporte, cultura y historia di nos Pais Aruba cu colornan sumamente bunita."

ATLETANAN

E atletanan cu ta participa ta: Philip Elhage cu lo participa den tiramento di pistool, Mikel Schreuders y Allyson Ponson cu ta den natacion.

LOGRO SRA. NICOLE HOEVERTSZ

Banda di e olimpiada cu ta inicia, Premier Wever - Croes a tuma un momento pa reconoce e gran noticia cu ta pone Aruba den luz sumamente positivo internacionalmente cual ta cu sra. Nicole Hoevertsz a wordo eligi como Vice Presidente di Comite Olimpico Internacional. Sra. Hoevertsz ya tin hopi aña trahando den e area aki y ta pasonan chikito cu el a tuma cada biaha pa por a subi di puesto den e Comite Olimpico Internacional.

"E nombracion aki ta hopi bon mereci y ta pone Aruba su nomber un biaha mas den luz positivo internacionalmente. Den nomber di Gobierno di Aruba mi ta felicita sra. Hoevertsz cu e encargo aki y ta desea cada un atleta hopi exito representando Aruba", Prome Minister a termina bisando.



Prome Minister Evelyn Wever-Croes: E di 5 dia di reunionnan cu stakeholders riba e tema di medio ambiente

NOS TIN CU CONSERVA NOS NATURALESA PA NOS POR PAS'E DEN UN MIHO ESTADO PA NOS FUTURO GENERACION

“Nos turismo ta basa riba naturalesa. Ban Cuid'e!



E otro tema importante cu a wordo trata riba e di 5 dia di reunionnan cu stakeholders en conexion cu formacion di Gabinete Wever-Croes II ta e tema di medio ambiente. Den e reunion aki tawata presente representantenan di Parke Nacional, Comision Flora and Fauna, Aruba Birdlife Conservation, NCRC (DNM,MDA,UNESCO). Un punto di discussion importante tawata e posibilidadnan pa crea un tipo di comision cu ta bay atende cu cambio climatico.

“Ta importante pa tur hende realisa cu naturalesa riba e pida baranca aki ta di suma importancia. Naturalesa no ta algo di nos pa destrui, nos tin'e presta y nos tin cu pas'e na nos futuro generacionnan. Nos tin cu conserv'e pa nos por pas'e den un miho estado pa nan. Aruba su pilar economico ta turismo, nos turismo ta basa riba naturalesa. Hende no ta bin di vakantie Aruba pa bay un pret park of pa bay mira edificacionan halto of monumento historico sino pa nos naturalesa. Nan ta bin pa e clima, e beachnan. Nan ta bin y kier gosa di nos naturalesa. Si nos perde nos naturalesa, nos ta perde nos unico pilar economico”, Prome Minister Evelyn Wever-Croes a enfatisa.

Un tema cu a bin dilanti tambe ta e UTV y ATV. Nos por mira cu den fin di siman atrobe nan ta wordo uza sin control y ta un destruccion di nos naturalesa. Gobierno ta condena hopi e actonan asina.

“Nos a tuma accion riba esun cu tin e licencianan y mi mes lo

drenta den un consulta di urgencia cu autoridadnan judicial pa wak con pa frena e tipo di desaroyonan aki. Nos mester wak con por multa esnan responsabel pasobra con cu bay bin berdad nos turistanan ta bin pa fiesta, relaha y gosa, pero e doño di e vehiculonan aki tin un papel sumamente imporatnte pa hunga y informa debidamente riba e reglanan cu tin”, Prome Minister a duna di conoce.

Gobierno a purba mas tanto posibel cu e industria aki tin un derecho di existencia pero no lo permiti cu ta sigui destrui nos naturalesa. Ta wordo poni un presion grandi riba Gobierno pa tuma accion y Gobierno lo no ria pa tuma accion tampoco.

“Nos naturalesa ta sostene nos ya cu e ta e unico cos cu cada un di nos ta depende di dje aki na Aruba. Nos no por permiti cu algun hende ta destrui nos naturalesa y causa problema pa henter e pais”.

E instancianan aki di medio ambiente a trece hopi mas punto dilanti manera tema di desperdicio, proteccion di naturalesa. Tur e puntonan aki a wordo treci dilanti bon elabora pa asina cu gobierno nobo forma, e minister encarga cu medio ambiente lo sigui atende mas den extenso riba e diferente temanan aki.

“Egruponan akitambe ta hendenan cu hopi pasion pa naturalesa y ora mi wak bek un mainta asina, mi tin tur confiansa cu nos lo bay dilanti”, Prome Minister a enfatisa.

Continuacion NOS TIN CU CONSERVA NOS NATURALESA....



Prome Minister Evelyn Wever-Croes: E di 5 dia di reunionnan cu Stakeholders riba e tema Finansas y Economia

BANCO CENTRAL Y AHATA CU CONSEHONAN POSITIVO Y PUNTONAN SIMILAR PA ACUERDO DI GOBERNACION

Diahuebs mainta e reunionnan cu stakeholders en conexion cu formacion di Gabinete Wever-Croes a continua. A reuni cu Banco Central y cu AHATA. Ambos reunion a bay bon cu intercambio di informacionnan.

Sra. Jane Semeleer di Banco Central a enfatiza hopi riba nos fundeshi monetario financiero pero tambe riba e desaroyo economico y unda gobierno kier hiba Aruba den e siguiente añanan.

“Akinan nos no ta papia caba di ‘business as usual’ pasobra esey lo ta algo cu no ta factibel mas. Mi ta kere e pandemia a siña nos tur esey y con nos ta transforma nos modelo economico pa asina cada ciudadano por crea su propio progreso y bienestar”.

Cu sra. Tisa LaSorte di AHATA a toca e tema cu ta di relevancia cu turismo. Indudablemente AHATA a trece tambe padilanti e importancia di participacion di gobierno den e sector aki. Reforma fiscal tambe ta un tema cu a wordo trata. Tambe a pidi atencion pa temanan urgente manera e status di nos planta di RWZI, problematica di UTV/ATV, temanan di ley laboral y recomendacionanan pa BTW of e tipo di reforma fiscal.

“Mi tin cu bisa cu tur dos reunion a bay positivo. No solamente conseho a wordo duna sino tambe hopi indicacion cu puntonan similar cu nos por uza como gobierno nobo den nos acuerdo di gobernacion. Esey ta mi meta di e reunionnan aki”.

E dos reunionnan di diahuebs ta e ultimonan pa e siman aki debi na otro compromiso di Prome Minister. Di diabierna pa awor a reuni cu 35 stakeholders. E reunionnan a tuma luga di e forma mas transparente posibel na unda a pidi e stakeholders pa duna un declaracion na prensa depsues di cada reunion y contesta e preguntanan cu prensa a prepara pa nan.

“Nos ta aprecia e papel importante cu prensa ta hungando den e parti aki di formacion di Gabinete Wever-Croes, treciendo tur e informacion aki padilanti pa pueblo por ta bon informa di tur detaye cu ta wordo treci den e reunionnan cu stakeholders”, Prome Minister Evelyn Wever-Croes a termina bisando.



Prome Minister Evelyn Wever-Croes: Actualmente ta concluyendo e prome fase den proceso di formacion di Gobierno

DIFICIL PA INDICA CUANTO TEMPO E PROCESO DI FORMACION LO DURA



Prome Minister Evelyn - Wever Croes a presenta un update di e proceso di formacion di Gobierno di Aruba cu ta andando. Comunidad por a tuma a traves di medionan di comunicacion cu tin diferente reunion tumando luga entre miembrongan di partido MEP, Raiz y stakeholders di diferente sector na Aruba. E reunionnan aki ta forma parti di e proceso pa yega na e acuerdo di gobernacion.

Prome fase di formacion

Premier Wever - Croes a splica cu e prome fase den e proceso di formacion di Gobierno ta encera cu mester yega na otro pa e acuerdo di Gobernacion, pa cual ta yegando na otro riba liianan grandi, sinembargo ta wardando pa e reunionnan cu stakeholders finalisa pa inclui nan puntonan tambe den e acuerdo. Hunto cu coleganan di partido Raiz y di partido MEP a reuni te cu aworaki cu 35 stakeholders. Esaki den cuadro di e instruccion 'formatie opdracht' di Gobernador.

Secuencia di proceso pa yega na formacion

Unabes cu e reunionnan conclui, e siguiente fase ta encera cu lo reparti e ministerionan entre partido Raiz y partido MEP pa por cumpli cu e acuerdo di gobernacion cu ta trahando riba dje.

Siguentemente, unabes cu sa cua ministerionan cada un partido ta haya, e ora ey cada partido lo bay haci proposicion pa candidatonan pa minister pa ocupa e funcionnan ey.

Despues di e proposicionnan aki, e proceso di screening pa minister lo cuminsa segun e landsbesluit cu tin desde september 2013.

Segun Premier Wever - Croes: "E proceso aki ta tuma su tempo y no por apresura esaki. Como formador, ora cu mester screen un cantidad grandi di persona, e ta tuma mas tempo tambe pa haci y mester por haci esaki den tranquillidad."

Despues cu e pasonan aki tuma luga, por bisa cu tin un Gobierno forma y ta cla pa bay over na huramentacion.

Pa finalisa Prome Minister a expresa cu e dificil pa indica cuanto tempo tur esaki lo dura (teniendo na cuenta e proceso cu mester encamina), pero ta trahando duro riba tur e aspectonan aki pa por tin un bon acuerdo di Gobernacion y e mihi Gobierno cu por ofrece na Aruba. Ta remarca cu tur e reunionnan cu stakeholders ta bayendo hopi bon y no tin ningun discordia entre partidonan Raiz cu MEP y tampoco den partido MEP (contrario na rumornan cu ta circula).

"Mi ta hopi agradecido na e confiansa cu pueblo a duna nos partido y nos lo demostra di no defrauda e confiansa ey," Premier Wever - Croes a termina bisando.

Prome Minister Evelyn Wever-Croes:

UPDATE PANDEMIA COVID 19

“Nos ta bayendo den e bon direccion y nos no kier frena e desaroyo cu nos tin”



Diahuebs mainta durante conferencia di prensa di Gobierno di Aruba, Prome Minister Evelyn Wever-Croes a duna un update di Covid-19.

E cifranan cu ta wordo publica ta indica cu Covid ta lantando cabes un biaha mas na Aruba. E cifranan di diaranson ta indica cu tin 111 caso activo di cual 56 ta residente y 55 ta no residente. Esaki ta debi na e variante Delta cu ta percura cu tin un grado di contagio hopi mas halto. E no residentenan no ta solamente turista sino tambe tin varios di nos propio studiantenan cu a bin di exterior pa pasa vakantie y talves no a haña oportunidad pa vacuna y aworaki ta den e cantidad di casonan aki.

E bon noticia ta, Prome Minister a indica cu esaki no ta motibo ainda pa alarma pasobra e capacidad na hospital, aunke tin pashent den hospital, ta safe. Ta importante si pa sa cu Covid ta lantando cabes. E aumento di caso ta trece cu ne cu nos mester cuminsa prepara un poco mas pa e dianan nos dilanti.

“Di aki un biaha mas mi ta urgi cada ciudadno di nos pais pa nos sigui cuida pa asina nos por purba domina e situacion cu nos ta aden. Un di e metonan mas efectivo di cuido ta e vacuna. Nos ta mira cu esanan cu a vacuna berdad tin un percentahe di nan cu ta hañando e virus pero nan no ta bira hopi malo di dje. Nos a mira si cu esnan cu no a vacuna ta esunnan cu ta hañando e virus aworakinan y ta esnan cu ta wordo hospitalisa cu consecuencia hopi serio di e virus akinan. Porfabor ban sigui vacuna”.

Aworakinan muchanan riba 12 año ta wordo vacuna. No mester traha cita. E hoben ta yega Sporthal Santa Cruz y por vacuna. Mester bay cu un mayor pa nan duna permiso pa vacuna e hoben. Tambe a habri oportunidad pa nos studiantenan den exterior, sea na Hulanda, Merca of otro parti, cu ta na Aruba pa 3 siman of mas, pa nan tambe vacuna. Mester ta na Aruba pa

3 siman pasobra den e periodo aki mester haya e di dos dosis y asina tin mas proteccion.

Nos tin facilidadnan di vacunacion, dus tur hende cu por, por fabor bay bay vacuna. No tin motibo pa bo keda sin vacuna. E consecuencianan si ta serio pasobra nos ta mira esnan cu no vacuna ta esnan cu ta birando malo y ta dreinta hospital cu consecuencianan hopi mas serio di e virus aki.

Si bo no kier vacuna, por fabor percura pa bo sistema di inmunidad ta halto pa bo sistema di salud ta bon y cuida bo mes hopi mas miho cu otronan ta cuida nan mes. Nos como gobierno no ta bay forsa niun hende pa vacuna. E ta bo responsabilidad e ora pa cuida bo mes hopi mas miho.

Pa tur ciudadano cu ta vacuna of no, cu kier of no kier, ban sigui cuida nos mes y nos familia. Laba man mas frecuente cu ta posibel y si no por uza handsanitizer, tene distancia mas hopi posibel of uza bo tapaboca. Y si bo tin un sintoma di griep tuma contacto cu bo dokter pa haci test si bo tin covid of no. Si bo tin Covid bo tin cu bay den isolacion pa un tempo pero e ora bo ta proteha e resto di bo familia tambe.


Na fin di dia loke nos kier ta pa Aruba prograsa. Nos ta bayendo den e bon direccion, nos no kier frena e desaroyo cu nos tin. Aruba tin yen di turista. Nos pais ta floreciendo. Hendenan cu no tabata tin trabou ta hañando trabou. Pero ainda tin un grupo di hende cu ta depende di ayudo di gobierno y pa nos yuda nan nos mester percura pa Aruba prograsa.

No ta e pais di mas rico, mas poderoso, of mas fuerte ta vence e pandemia aki pero esun mas disciplina y den esaki Aruba a demostra. Nos a logra den pasado, ban sigui haci'e pasobra nos ta stima nos mes, nos familia y Aruba”, Prome Minister a termina bisando.

CASONAN ACTIVO COVID NA ARUBA

22 JULI 2021	TOTAL	RESIDENTE	NO-RESIDENTE
Casonan Nubo	15	14	1
Activo	111	56	55
Recupera	11052	10148	904
Positivo	11272	10311	961
Morto	109	108	1

UPDATE COVID-19 CONFERENCIA DI PRENSA



Departamento di Salud Publico: UPDATE 22 DI JULI 2021

ULTIMO INFORMACION

Casonan di Corona Virus na Aruba
22 di Juli 2021

22/7/2021	TOTAL	RESIDENTE	NO-RESIDENTE
Casonan Nobo	21	12	9
Activo	130	65	65
Recupera	11054	10150	904
Positivo	11293	10323	970
Morto	109	108	1





CONDECORACION REAL ARUBA 2022



GOBIERNO DI ARUBA

Con pa propone un persona?



Por haci proposicion dor
di yena dos formulario.

E formularionan aki ta obtenibel durante
oranan di oficina na balie di Bestuurskantoor na
O'stad y San Nicolas.

Tambe por download e formularionan for di e
website di governo: www.gobierno.aw
www.overheid.aw
www.government.aw

Ta ricibi
peticionnan pa año
2022 entrante dia **26 mei 2021**
E ultimo dia pa entrega peticionnan
ta dia **6 augustus 2021**

PA MAS INFORMACION POR YAMA OF MANDA E-MAIL:

sra. F Perez-Lopez tel: 583-8425 | sr.V. Frank tel: 587-4979 | condeco.aruba@gmail.com



Un Feliz Dia

GABINETE WEVER-CROES

ISLA ONLINE
NOTICIA DI GOBIERNO